

粵道貢國說目錄

粵道貢國說目錄

卷一

暹羅國一


卷二

暹羅國二

卷三

荷蘭國

卷四



粵道貢國記
西洋國

意大利亞國

博爾都噶爾雅國

卷五

暎咭喇國一

卷六

暎咭喇國二

粵道貢國說卷一

澄海縣訓導臣梁廷枏謹編

謹案我

朝威德覃敷遠無弗屆朝鮮一國率先效順
厥後琉球越南日本相繼啟關咸稱屬國
同奉正朔久列藩封方物貢期胥歸定則
此外則西海窮陬從古未通之國靡不向
化輸誠梯費航琛來

庭恐後入貢道路例按海洋遠近分隸沿邊
各省宗伯掌之由廣東入貢者惟暹羅荷
蘭西洋所屬意大里亞博爾都噶爾雅以
逮暎咭喇諸國每屆使舟至境大吏以
聞輒奉

俞旨燕勞有典伴送有官厚往薄來

恩施優渥臣海邦生長耳濡目染縷牒難書然
往籍可徵卽方隅典故已足覘

一統無外之規

聖德懷柔之遠與前代遣使招致者迥殊彼世沐
皇仁所爲感激歡欣當不知如何鼓舞其有吐虫
尤之霧而煽鯨鯢之波者使天良未泯靜
念將何以爲心是用溯考舊章就諸國貢
道之例出廣東者各舉其入貢之期奉貢
之物

勅詞之褒獎

賜子之便蕃悉著於篇俾共知

昭代同文之盛至若越南接壤廉瓊依

光更近民夷牙錯咨會爲多顧其貢道自出粵

西兩不相越今不載焉

入貢通例

順治元年定外國朝貢以表文方物爲憑

該督撫查照的實方准具題入貢

又定凡外國人送該督撫禮物永行禁止

又定貢使到京所貢方物會同館呈報禮
部提督該館司官赴館查驗分撥員役管
領該部奏

聞貢物交進內務府象交鑾儀衛馬交上駟院腰
刀鹿皮青黍皮等物交武備院凡進硫黃
者留交該督撫收貯又定外國貢使在途
病故禮部具題令內院撰祭文所在布政
司備祭品遣堂官致祭一次仍置地塋立

石封識若同來使臣自願帶同骸骨者聽
若到京病故給棺木紅緞遣祠祭司官

諭祭兵部應付車輛人夫其應賞衣服緞疋等物
仍付同來使臣領回頒給若進貢從人在
京病故者給棺木紅紬在途病故者聽其
自行埋葬

凡進貢員役順治元年定每次不得過百
人入京員役止許二十人餘皆留邊聽賞

其進貢船不得過三隻每船不得過百人
又定凡外國進貢除定例船隻外其接貢
探貢等船一概阻回不許放入

順治八年題准凡外國進貢正副使及定
額從人來京沿途口糧驛遞夫馬船車該
督撫照例給發差官伴送及兵丁護送到
京其貢使回國沿途口糧驛遞夫船兵部
給與勘合其留邊人役該地方官照例給

與食物嚴如防守候貢使回國時同送出境

康熙五年題准凡外國奏疏不得交付遣往使臣帶來合專差官交該督撫轉奏

六年定外國投文到該督撫該督撫卽開閱原文議題

又題准凡督撫提鎮等官不許擅自移文外國

乾隆三十六年六月禮部奏奉

聖諭據諾穆親奏南掌國遣使貢象到滇卽照向

例派員伴送起程復檢查乾隆三十五年部議嗣後外國入貢俱令按省派員伴送更換交代毋許一人長送乃並未詳查新例仍照上屆辦理實屬錯悞請交部嚴加議處等語已批該部議奏矣此事禮部新定之例未爲妥協該卽因福建伴送琉球貢使到京逾期議令派出伴送

粵道貢國說
之員按省更替毋許一人長送意在防其沿途稽滯而未能切當事情福建之於琉球雲南之於南掌貢使初至該省皆有應行照料事宜既派有承辦伴送之員卽當終始其事而派員與貢使伴行日久一切與之相習途中屢易生手亦覺非宜若慮派員在路托故遷延止須於經過各省添派委員護送儼行自不虞其任意遲緩若以此而論議停長送專員何異因噎廢食

所有外國貢使來京及由京歸國派員伴送及各省添員護送之例着該部另行定議具奏諾穆親雖未照禮部新例而所辦未爲錯悞毋庸交部議處欽此

臣等伏查乾隆三十五年

臣部因琉球貢使自福建起身行走四月有餘直至正月二十一日始行到京有悞

元旦

朝賀當查福建撫臣所委伴送官僅一試用舉人

王紹曾既不足以資彈壓任意稽延經過
地方官又不爲趨送以至沿途逗遛濡滯
是以奏請嗣後貢使到省該撫於同知通
判中遴委一員伴送一面知照前途亦按
省派委同知等官一員更換交代毋須一
人長送以免隔省呼應不靈之弊并請嗣
後各省凡有外國入貢者俱照此畫一辦
理奉

旨允准通行在案茲因南掌遣使慶賀

萬壽貢象到滇該署撫諾穆親業已派員伴送起
行旋以未照新例辦理請

旨交部嚴加議處奉

硃批該部議奏欽此復奉

諭旨禮部新定之例未爲妥協着另行定議具奏
諾穆親所辦未爲錯悞毋庸交部議處欽此
臣
等伏讀

聖諭諄詳開示仰見我

皇上加惠遠人辦理周密之至意伏思長途伴送夷使原須彼此相習若屢經更換誠覺非宜從前所定之例未爲詳盡臣等酌議嗣後各省貢使到境該撫卽於同知通判中遴委一員應用武弁者并酌派守備一員伴行長送至京俾沿途足資照料彈壓并一面知照經過各省預定添派妥員護送

僭行按省更替庶不致委員逾省呼應不靈其回國時仍令原派委員長送經過各省亦仍遴委妥員護送出境如此則既有長伴熟習之人照着經理復有沿途添派之員護送僭行自不至稽延貽悞而於柔遠之道益昭周密矣至琉球蘇祿安南等貢使回國向例臣部揀選司員引

見派出伴送嗣後應請停止以歸畫一奉

旨依議欽此

五十六年奉

旨嗣後外藩各國貢表來京貢獻方物所有安南
緬甸暹羅南掌等國來京使臣及隨從人等應
行照料事宜俱著內務府經理仍著禮部派委
司官二員幫同照應欽此

暹羅國一

謹按明史及東西洋考並云暹羅卽百赤

土國後分爲羅斛暹二國羅斛爲暹所併
明賜以暹羅國王印始稱暹羅地在越南
之西緬甸之南占城之西北其西卽榜噶
喇海也據隋書云赤土國扶南別種在南
海中水行百餘日而達所都土色赤因以
爲號其王姓瞿曇氏名利富多塞不知有
國遠近稱其父釋王位出家傳位於利富
多塞其俗敬佛煬帝卽位募能通絕域者

大業三年屯田王事常駿虞部王事王君
政等請使赤土齋物五千段賜赤土王其
年十月駿等自南海郡乘舟晝夜二旬至
蕉石山而過東南泊陵伽鉢拔多洲西與
林邑相對又行二三日西望見狼牙修之
山於是南達雞籠島至赤土界其王遺婆
羅門鳩摩羅以舶三十艘來迎進金鎖以
纜駿舩月餘至其都王遣其子那邪迦請

與駿等禮見先遣人送金盤貯香花并鏡
鑷金合二枚貯香油金瓶八枚貯香水白
疊布四條以供使者盥洗其日那邪迦又
將象二頭持孔雀蓋以迎使人并致金花
金盤以藉詔函男女百人奏蠡鼓婆羅門
二人導路至王宮駿等宣詔訖奏天朝樂
事畢還館又遣婆羅門就館送食以草葉
爲盤其大方丈因謂駿曰今是大國中人

非復赤土國矣飲食疎薄願爲大國意而食之後數日請駿等入宴王前設兩牀牀上並設草葉盤有黃白紫赤四色之餅牛羊螾蝓之肉百餘品延駿升牀從者坐於地席各以金鍾置酒女樂迭奏禮遣甚厚尋遣那那迦隨駿貢方物并獻金芙蓉冠龍腦香以鑄金爲多羅葉隱起成文以爲表金函封之令婆羅門以香花奏蠡鼓而

送之旣入海見綠魚羣飛水上浮海十餘日至林邑東南並山而行其海水濶千餘步色黃氣腥舟行一日不絕云是大魚糞也駿以六年春與那那迦於宏農謁帝帝大悅賞各有差又元史云成宗元貞元年進金字表欲朝廷遣使至其國比其表至已先遣使蓋彼未之知也賜來使素金符佩之使急追詔使同往以暹人與麻里子

兒舊相讐殺至是皆歸有旨諭暹人勿傷
麻里子兒大德三年其國主上言其父在
位時朝廷嘗賜鞍轡白馬及金縷衣乞循
舊例以賜帝以丞相完澤答刺罕言彼小
國而賜以馬恐其隣忻都輩譏議朝廷仍
賜金縷衣不賜以馬又明史云卽隋唐赤
土國後分爲羅斛暹二國暹土瘠不宜稼
羅斛地平衍種多獲暹仰給焉元時暹常

入貢其後羅斛強併有暹地遂稱暹羅斛
國洪武三年命使臣呂宗俊等齎詔諭其
國四年其王參烈昭毘牙遣使奉表與宗
俊等偕來貢馴象六足龜及方物詔賜其
王錦綺及使者幣帛有差五年貢黑熊白
猿明年其王之姊參烈思宐別遣使進金
葉表貢方物於中宮却之已而其姊復遣
使來貢仍却之而宴賚其使時其王懦而

不武國人推其伯父參烈寶毘邪噠哩哆
囉祿主國事遣使來告貢方物宴賚如制
已而新王遣使來貢謝恩又遣使賀正旦
貢方物獻本國地圖七年使臣沙里拔來
貢言去年舟次烏猪洋遭風壞舟飄至海
南賴官司救護尙存飄餘兜羅綿降香蘇
木諸物進獻廣東省臣以聞帝怪其無表
旣言舟覆而方物乃有存者疑其爲番商

命却之世子蘇門邦王昭祿羣臂亦遣使
上箋於皇太子貢方物命引其使朝東宮
宴賚遣之其舊明臺王世子昭孛羅局亦
遣使奉表朝貢宴賚如王使十年昭祿羣
膺承其父命來朝帝喜命禮部員外郎王
恒等齋詔及印賜之文曰暹羅國王之印
併賜世子衣幣及道里費自是其國遵朝
命始稱暹羅比年一貢或一年兩貢二十

八年昭祿羣膺遣使朝貢且告父喪命中官趙達等往祭勅世子嗣位永樂元年賜其王昭祿羣膺哆囉諦刺駝紐鍍金銀印其王卽遣使謝恩二年其王以帝降璽書遣使來謝貢方物賜賚有加并賜列女傳百冊使者請頒量衡爲國式從之時暹羅所遣貢使失風飄至安南盡爲黎賊所殺止餘孛黑一人後官軍征安南獲之以歸

帝憫之七年使來祭仁孝皇帝命中官告之几筵時奸民何八觀等逃入暹羅帝命使者還告其主毋納逋逃其王卽奉命遣使送八觀等還命張原齋勅獎獎之十四年三月波羅摩刺劄的賴遣使告父之喪命中官郭文往祭別遣官齋詔封其子爲王賜以素錦素羅隨遣使謝恩十七年命中官楊敏等護歸以暹羅侵滿刺加遣使

責令輯睦王復遣使謝罪景泰四年命給事中劉洙行人劉泰祭其故王波羅摩刺劄的賴封其嗣子把羅蘭米孫刺爲王天順元年賜其貢使及釵花金帶成化九年貢使言天順元年所頒勘合爲蟲所蝕乞改給從之十七年貢使還至中途竊買子女且多載私鹽命遣官戒諭諸番先是汀州人謝文彬以販鹽下海飄入其國仕至

坤岳猶天朝學士也後充使來朝貿易禁物事覺下吏十八年遣使朝貢且告父喪命給事中林霄行人姚隆往封其子國隆勃刺畧坤息刺尤地爲王宏治十年入貢時四夷館無暹羅譯字官閣臣徐溥等請移牒廣東訪取能通彼國言語文字者赴京備用從之正德四年暹羅船有飄至廣東者市舶中官熊宣與守臣議稅其物供

軍需事聞詔斥宣妄攬事柄撤還南京十年進金葉表朝貢館中無識其字者閣臣梁儲等請選留其使一二人入館肄習報可嘉靖元年暹羅占城貨船至廣東市舶中官牛榮縱家人私市論死如律三十二年遣使貢白象及方物象死於途使者以珠寶飾其牙盛以金盤并尾來獻帝嘉其意厚遣之隆慶中其隣國蠻牛求婚不得

慙怒大發兵攻破其國王自經擄其世子及天朝所賜印以歸次子嗣位奉表請印子之嗣王勵志復仇萬歷間敵兵復至王整兵奮擊大破之暹羅由是雄海上移兵攻破真臘降其王從此歲歲用兵遂霸諸國六年遣使入貢其後奉貢不替崇禎十六年猶入貢其國周千里風俗勁悍習於水戰大將用聖鐵裹身刀矢不能入聖鐵

者人腦骨也王瑣里人官分十等自王至庶民有事皆決於其婦其婦人志量實出男子上婦私華人則夫置酒同飲恬不爲怪曰我婦美而爲華人所悅也崇信釋教男女多爲僧尼亦居菴寺持齋受戒衣服頗類中國富貴者尤敬佛百金之產卽以其半施之地卑濕人皆樓居男女椎結以白布裹首富貴者死用水銀灌其口而葬

之貧者移至海濱卽有羣鴉飛啄俄頃而盡家人拾其骨號泣而棄之於海謂之烏葬交易用海貳是年不用貳則國必大疫其貢物有象牙犀角孔雀尾翠羽龜筒六足龜寶石珊瑚片腦米腦糠腦油腦柴薺薇水碗石丁皮阿魏紫梗藤黃硫黃藤竭沒藥烏參泥安息香羅斛香速香檀香黃熟香降香乳香木香丁香烏胡椒蘇木豆

奧道貢國誌
寇萐芟烏木大楓子撒哈刺西洋諸布其
國有三寶廟祀中官鄭和又

大清一統志云其國在占城西南東連大呢西
接蘭場北界大海國周千里有大庫司九
府十四縣七十二又

皇朝職貢圖云其官制九等四等以上戴銳頂
金帽嵌以珠寶五等以下則以絨緞爲之
衣錦繡及織金或花布短衣繫錦帶婦人

以金銀爲簪釧約指上衣披五色綵縵下
衣五綵織金花縵拖地長二三寸足履紅
革鞞鞋其選舉皆引至王前咨以民事應
對得當卽授官服候用文字橫書有事則
具書文朗誦呈之地卑濕民皆樓居坐卧
卽以樓板上藉以氊席其風俗勁悍習於
水戰崇佛齋僧飼象取牙以奉夷目男白
布纏頭衣短衣曳革履佩刀劍婦女椎髻

上衣披青藍布縵下衣五色布短裙性善
游冶亦下紡績俗重女輕男又海國聞見
錄云尊敬中國用漢人爲官屬理國政城
郭軒豁從海口至國城溪長二千四百里
水深濶洋舶隨流出入通黃河支流岸夾
大樹田疇饒廣農時闔家棹舟耕種事畢
而回無俟鋤芸穀熟仍棹舟收穫而歸粟
橐長二丈許以爲入貢土物蓋播秧畢而

黃河水至苗隨水以長水尺苗尺水丈苗
丈無旱澇之患水退而稻熟矣米價石可
三星以銀豆爲幣大者重四錢中者一錢
次者五分小者二分五釐其名皆王鑄字
法不得剪碎零用找以海螺巴今臚採諸
書詳其風俗云

國初定貢期三年一貢由兩廣總督廣東巡
撫代題

敕部議准後知照該督撫令其入貢其貢使來
有正使二使三使四使其下爲從人赴京
者不過百二十六人其貢物爲馴象備象
龍涎香幼噀香犀角象牙荳蔻降香騰黃
大楓子土桂皮息木蘇木革撥樟腦兒茶
皮樹膠皮硫磺檀香冰片翠鳥皮孔雀尾
潤紅布大荷蘭氈水片油薔薇露又貢物
一分其數減半或有加進之物聽其隨宜

進獻題准收受交內務府象交鑾儀衛表
用金葉貯以金筒錦袱錦袋袋上有金鈕
金圈加盛以螺鈿盒一貼金盒一並有花
緞盒套套上各有金圈其

頒賞賜國王錦八匹織金緞八匹織金紗八匹
織金羅八匹紗十二匹緞十八匹羅十八
匹

賜王妃織金緞四匹織金紗四匹織金羅四匹

緞六匹紗六匹羅六匹貢使各織金羅三匹緞八匹羅五匹裏紬二匹布一匹通事緞五匹羅五匹絹三匹從人各絹三匹布八匹伴送官彭緞袍一件如貢使係微員視職分酌減通事從人等俱一例酌減

賞給所

賞國王王妃物件及特恩加賜物件俱禮部移內閣撰入

敕內交貢使齎回

順治九年十二月遣使請貢並換給印敕

勘合

十年廣東巡撫奏暹羅國遣使請貢

十六年兩廣總督題准暹羅國再來探貢所帶壓船貨物就地方交易其抽丈船貨稅銀清冊移送戶部察核

康熙二年暹羅國正貢船行至七洲海面

遇風飄失止有護貢船一隻來至虎門仍
令遣回

三年七月平南王尙可喜奏暹羅國來餽
禮物却不受

是年題准進貢正貢船二隻令員役二十
名來京補貢船一隻令六人來京准該國
貿易一次其年暹羅入貢方物凡十三種
有孔雀六足龜

謹案是年定制孔雀六足龜後俱免進

四年十一月國王遣陪臣握坤司吝喇耶
低邁禮等齎金葉表文航海入貢表稱暹
羅國王臣森列拍臘照古龍拍臘馬噶陸
坤司由提呀菩埃誠惶誠恐稽首謹奏

大清皇帝陛下伏以

新君御世普照中天四海沾帡幪之德萬方被教
化之恩卑國久荷

天朝恩渥未傾葵藿之心今特躬誠朝貢敢效
輸欵敬差正貢使握坤司吝喇耶低邁禮
副貢使握坤心勿吞互替三貢使握坤司
敕博互縹大通事揭帝典辦事等臣梯航
渡海齋奏金葉表文方物譯書一道前至
廣省差官伴送京師進獻用伸拜舞之誠
恪盡遠臣之職伏冀
俯垂寬宥不恭微臣瞻

天仰

聖曷勝屏營之至謹具表稱奏以

聞

聖祖仁皇帝命從優賞賚

御前方物龍涎香西洋閃金緞象牙胡椒騰黃荳
蔻速香烏木大楓子金銀香蘇木孔雀龜
凡十有三種

皇后前方物並同各減半

賜國王緞紗羅各六織金緞紗羅各四王妃各減

一二正副使每人正賞采緞羅各四絹二布

一衣緞表裏各一加賞織金羅采緞各二

鞞一雙通事從人緞羅絹布鞞有差

又議准該國正貢船二令員役二十人來

京補貢船一令六人來京

是年題定暹羅國貢期三年一次貢道由

廣東例於常貢外有加貢無定額

又覆准進貢船不許過三隻每船不許過

百人來京員役二十名其接貢探貢船概

不許放入

謹按暹羅貢道據雍正年修會典議在康

熙四年嘉慶年修會典議在六年年各異

又按是年暹羅進貢正貢船一隻護貢船

一隻載象船一隻故有是議

五年十一月國王遣陪臣握坤司各喇耶

低邁禮等來貢部議以所貢物與會典不符應令後次補貢得

旨暹羅小國貢物有產自他國者與會典難以相符所少貢物免其補進以後但以伊國所有者進貢欽此時貢物內有神幔一條以非進奉天朝之禮交來使帶回

賜國王王妃與四年同正副使每人緞七羅四織金羅絹各二裏綢一布一鞞一雙通事從

人及留邊人給賞各有差

九年遣使入貢如例

十一年三月國王遣其陪臣來貢得

旨貢使所攜貨物願至京師貿易則聽其自運或願在廣東貿易督撫委官監視之欽此

十二年二月國王遣陪臣奉金葉表文入

貢表稱暹羅國王臣森烈拍臘照古龍拍

臘馬嘑陸坤司由提呀菩埃誠懽誠忭稽

首頓首啟奏

大清皇帝陛下伏以

天生聖君嗣登寶位剛明果斷國治民安聲聞海外澤及諸彝卑國世荷

皇恩微臣繼襲踐祚遠霑

九重德化莫能瞻仰

天顏幸遇貢期敢效輸款端差正貢使臣握坤司

咨喇耶低邁禮二貢使臣握坤司殊噶刺

耶西三貢使臣握坤押派瓦耻通官握坤

心物邁知理揭帝典辦事文司叨申理嘑

等梯航渡海齎捧金葉表文方物譯書前

至廣省差官伴送

京師朝貢進獻代伸拜舞之誠恪盡遠臣之

職恭祝

皇圖永固

帝壽遐昌伏冀

俯垂鑒納庶存懷遠之義微臣遵

旨再陳明季舊頒敕銀印卑國以憑進京朝貢前
因宮殿火煨燼無存今進京朝貢無可爲
憑微臣以表文內不敢瑣瀆委握耶大庫
具文呈部轉奏

聖旨特賜敕銀印以便進京奉貢康熙九年三月
內貢使回國禮部奉

旨咨文到暹羅內開使臣具表題請伏望

聖恩頒賜敕印以光屬國庶朝貢有憑按古例貢
船三隻到廣貢使捧表進

京朝貢其船置辦國需隨汎回國庶臣早知
聖體興隆於次年再至廣省迎接

聖敕回國伏乞

俞旨賜依古例特

敕禮部行文廣省各衙門遵照施行微臣不勝瞻
天仰

聖懽忭踴躍之至謹具表朝貢以

聞後開貢物

皇帝方物金葉表文一道譯字表文一道龍亭一

座

安奉金
葉表文

馴象一隻孔雀四隻六足龜四

隻龍涎香一觔盤石一觔沉水香二觔犀

角六座速香三百觔象牙三百觔安息香

三百觔白荳蔻三百觔騰黃三百觔胡椒

三百觔大楓子三百觔烏木三百觔蘇木

三千觔胡椒花一百觔紫梗二百觔樹皮

香一百觔樹膠香一百觔翠鳥毛六百張

孔雀尾十屏兒茶一百觔鮫綃布六匹雜

花色大布六匹襪天四條紅布十匹紅撒

哈喇布六匹印字花布十匹西洋布十匹

大冰片一觔中冰片二觔片油二十瓢樟

腦一百觔黃檀香一百觔薔薇露六十罐

硫黃一百觔

皇后方物一樣減半

內止少奉馴象

聖諭暹羅國航海遠來抒誠進貢其蟲蛙短少等物免令補進嗣後各國皆照此例欽此四月

冊封暹羅國王

領鍍金駝紐銀印

賜誥命令使臣齎回

誥曰來王來享要荒昭事大之誠悉主悉臣國家著柔遠之義朕纘承鴻緒期德教暨於遐陬詎

撫多方使屏翰躋於康乂彝章具在渙號宜頒爾暹羅國森烈拍臘照古龍拍臘馬噶陸坤司由提呀菩埃秉志忠誠服躬禮義旣傾心以向化乃航海而請封礪山帶河克荷維藩之寄制節謹度無忘執玉之心念爾惻怵朕甚嘉焉今封爾爲暹羅國王賜之誥命爾其益矢忠貞廣宣聲教膺茲榮寵輯乃封圻於戲保民社而王纂休聲於舊服守共球之職懋嘉績於侯封爾

其欽哉無替朕命

貢使事畢禮部堂官司員朝服在

午門前恭設几案鴻臚寺官引貢使等行三
跪九叩首禮跪領

誥印移咨該國王令王出城恭迎

誥印

二十三年國王遣正使王大統副使坤孛
述列瓦提從人三十名具金葉文入貢奉

旨覽王奏航海遠來進貢方物具見悃誠可嘉知
道了餘著議奏欽此又奉

聖諭暹羅國進貢員役回國有不能乘馬者官給
夫轎從人給舁夫欽此

是年國王附奏言貢船到虎跳門地方官
阻滯日久迨進至河下又將貨物入店封
鎖候部文到時方准貿易每至毀壞乞

敕諭廣省嗣後貢船到虎跳門具報之後卽放入

河下俾貨物早得登岸貿易又本國採辦
器用乞

諭地方給照置辦下部議尋經議准應如該國王
所請行

又奏准暹羅國照例頒賞其鞞皆折絹

又覆准貢使回國除護送來京官外特差
本部司官筆帖式各一人伴送

二十四年題准暹羅國王原

賞緞三十四今加十六共表裏五十

四十七年國王森烈拍臘照古龍拍臘馬
噶陸坤司由提呀菩埃遣陪臣恭進金葉
表文進到貢物外加進貢物九件其副貢
船被風漂至安南地面續到粵東省仍差
官伴送至京進馴象二隻外添進金絲猴
二隻

賜國王王妃及貢使均照二十四年議定之例其

副貢人員等照從人賞例絹各二布各七
廣東伴送經歷亦照例賞彭緞袍一領
又覆准暹羅國進貢船壓艙貨物如願在
廣東地方貿易照例免其收稅

五十九年國王遣陪臣恭奉金葉表文貯
以金桶裹以錦袱上飾金珠三金圈七盒
三重內盒飾螺鈿外盒飾金紫梗牌二入
貢馴犀二隻又貢使呈稱國王命加貢西

洋金緞二疋大西洋闊宋錦一疋

六十一年四月國王遣使恭進金葉表文
於貢物外獻金筒一螺鈿盒一貼金盒一
金珠三金圈七錦袱二紫梗牌一馴犀一
又貢使呈稱奉國王命加貢大西洋金緞
二大西洋濶宋錦一俱交總管內務府奉

旨覽王奏傾心向化遣使航海遠來進貢方物具
見惻誠歷久彌篤深爲可嘉欽此

又議准暹羅國入貢照安南國例加

賜國王緞八紗四羅八織金緞紗羅各二王妃緞

織金緞紗織金紗羅織金羅各二貢使四

人每人加緞羅織金羅絹各一裏一通事

四人二人加緞羅絹各一裏一二人加緞

羅絹各一從人二十一名加絹布各一

又覆准暹羅國奏稱彼國有二紅皮船前

因禁洋被留令廣東督撫查明交貢使帶

回其在廣駕船水手人等係內地者各撥

原籍安插係暹羅夷人令隨船回國

又奏准貢使回國遣禮部漢司官一人伴

送

又覆准暹羅國進貢後補進犀牛貢使係

微員比具表進貢之使酌減

賞緞六羅三織金羅二絹三裏二布一通事緞三

羅三絹二從人四名絹各二疋各六件送

驛丞

賞彭緞袍一領奉

旨朕聞暹羅國米甚豐足價亦甚賤若於福建廣東宜波三處各運米十萬石來此貿易於地方有益此三十萬石米係爲公前來不必收稅禮部問暹羅使人定議具奏欽此遵

旨會問來使據稱該國米用內地斗量每石價值二三錢今議定載米到時每石給價五錢

除爲公運三十萬石不收稅外其帶來米糧貨物任從貿易照例收稅

粵道貢國說卷之一終

粵道貢國說卷二

澄海縣訓導臣梁廷枏謹編

暹羅國二

雍正二年十月二十八日廣東巡撫年希堯題報暹羅國運米併進穀種等項奉

上諭暹羅國欽遵

聖祖仁皇帝諭旨不憚險遠進獻穀種果樹及洋鹿獾犬等物最爲恭順殊屬可嘉作何獎賞著

定議具奏所奏穀種鹿犬已經差官送京各種
果樹俟來歲春和另行委解知道了運來米石
令地方官照粵省現在時價速行發賣不許行
戶任意低昂所奏每米一石定價五錢則賤買
貴賣甚非朕體恤小國之意著行文浙閩此次
已到之米與該國現經發運續到者皆照粵省
一體遵行嗣後且令暫停俟有需米之處候朕
降旨遵行其壓船隨帶貨物本當照例徵稅但

該國王既能輸誠向化冒險遠來此次應輸稅
銀著一槩免徵來船梢目徐寬等九十六名雖
係廣東福建江西等省人民然住居該國歷經
數代各有親屬妻子實難勒令遷歸著照所請
免令徐寬等回籍仍在該國居住以示寬大之
典欽此

御

前貢物龍涎香一觔銀盒裝西洋閃金花緞六
疋象牙三百觔胡椒三百觔荳蔻二百觔

粵道貢國記
膳黃三百觔蘇木三千觔速香二百觔烏
木三百觔大楓子三百觔金銀香二百觔
皇后前貢物並同數目減半

又議准暹羅國入貢照康熙六十一年加
賜之例船長照通事例番梢照從人例加賞緞羅
絹布有差其船長雖非貢使可比但載運
米糧向化遠來於原賞布十疋外再各加
賞十疋又

特賜國王各色緞二十松花石硯玉器瓷器瑤
器等物差司官齎賞物一併送至廣東交
與該撫付船長領回

四年覆准暹羅國前經奉

旨暫停運米所差探貢二船帶有米石貨物伊等
由該國起行尙在未奉

旨之先既已涉險遠來聽其就近發買俟風訊回
國

六年禮部議覆福建巡撫常賚疏言暹羅國王誠心嚮化遣該國商人運載米石貨物直達廈門請聽其在廈發賣照例征稅委員監督嗣後暹羅運米商船來福建廣東浙江者請照此一體遵行應如該撫所請奉

旨依議米穀不必上稅著爲例欽此

七年六月該國載米船艘因風飄泊其撈

回壓船貨物並免其征稅

七月國王遣陪臣朗微述申黎呼等齎金葉表文貯以金筩錦囊與康熙五十九年同入貢

御前方物馴象龍涎香幼饌石冰片沉香犀角孔

雀尾翠鳥皮象牙速香安息香紫降香荳蔻
菴臙黃胡椒大楓子烏木華撥紫梗桂皮
兒茶皮樟腦硫黃檀香樹膠香織金頭白

袈裟桃紅袈裟幼花布闊幼花布織金頭
白幼布闊紅布花布幔大荷蘭氈冰片油
薔薇露

皇后前方物不進象餘物減半又加貢寶劍仗劍
金地交枝柳條板帶奉

旨暹羅國王遣使遠來貢獻方物具見悃誠朕念
該國遠隔海洋齎送不易欲酌量裁減以示恩
卹遠藩之意但此次貢物既齎送前來難以帶

回著照往例收納其常貢內有速香安息香袈
裟布疋等十件無必須用之處嗣後將此十件
免其入貢永著爲例欽此遵

旨議定免貢速香安息香胡椒紫梗紅白袈裟白
幼布幼花布闊幼花布花布幔等物

皇后前照此免貢

又奏請

召見貢使奉

旨著大貢使於同來貢使內選一人合二人進見
時貢使呈稱

京師爲萬國所景仰國王意欲令伊等觀光
上國遍覽名勝回述以廣見聞奉

旨不必禁止著賢能司官帶領行走仍賞銀一千
兩若所喜物件聽其購買欽此又呈稱奉國王
命本國所產馬匹甚小久慕

天朝所產馬駝羸驢之高大請各買三四匹回

國奉

旨著照所請准其購買所買價值著內庫支給欽
此照康熙六十年加賞例

賜國王緞羅各十有八紗十有二錦緞織金緞羅
紗各八王妃緞羅紗各六織金緞紗羅各
四來使四人每人各緞八羅絹五織金羅
三裏二布一通事各緞羅五絹三從人各
絹三布八

特賜國王

御書天南樂國四字內庫緞二十五器八件瑤瑯器一件松花石硯二方玻璃器二種共八件瓷器十四種共百四十六件貢使內造緞八銀百兩

又十一月三十日奉

上諭暹羅國遠隔重洋輸誠向化恭順修職歷有年所其所請採買物件著行令該撫採買賞給

以示朕嘉惠遠人之意欽此

乾隆元年六月國王森烈拍照廣拍馬嘯陸坤司由提呀菩埃以嗣立故遣陪臣朗三立哇提等齎表及方物例貢象一隻因航海故增一以備又加進金緞二匹花幔一條並咨禮部言往時

欽賜蟒龍大袍藏承

恩亭上歷世久遠難保無虞懇再邀

恩賜一二襲經據情代奏奉

旨暹羅遠處海洋抒誠納貢除照定例給賞外可
特賞蟒緞四匹欽此禮部奏稱暹羅昭丕雅大
庫呈稱伊國造福送寺需用銅斤奉禁之
後無從採辦懇請准其赴粵採買查銅斤
關係鼓鑄禁止出洋定例已久今若准其
採買恐日後奸商藉此爲由越境滋弊應
毋庸議奉

旨暹羅遠處海洋抒誠納欵採買銅斤一項該國
王稱係造福送寺之用部議照例禁止不許令
其採買固是今特加恩賞給八百觔後不爲例
欽此

又議奏暹羅國陪臣朗三立哇提等四人
入貢來京或

召見大貢使一人或四人或令其選一人同大貢
使二人進

見或停其進

見之處請

旨遵行奉

旨皆令進見

又奏朝鮮國來使

召見

賜坐

賜茶原因其該國王族人稱君者與我

國內大臣位次不甚相懸故相待如此之優
至琉球安南暹羅等國差來陪臣若係該
國王兄弟世子來朝自應如朝鮮之例若
尋常貢使乃伊國陪臣與內大臣相去懸
遠其儀注似不宜照朝鮮國稱君來使之
例今暹羅國貢使朗三哇提等

召見之日

皇帝御乾清宮

升寶座應入班之內大臣侍衛等照例排班序立

禮部堂官引來使隨帶通事一人由

乾清門西門入於丹墀西邊行三跪九叩禮

畢禮部堂官由西階引至

乾清宮中門外跪通事在來使西邊稍後跪

皇帝慰問畢引出候

旨賜茶或賜飯畢引至

午門外謝

恩其議政大臣等會集

賜坐

賜茶之處似應停止嗣後琉球安南等國來使皆

照此例遵行奉

旨所奏是此次仍照

世宗憲皇帝召見例行欽此

七年福州將軍兼管閩海關事務新柱奏

本年七月內有暹羅國商人方永利一船

載米四千三百零又蔡文浩一船載米三千八百石並帶有蘇木鉛錫等貨先後進口查該番船所載米石皆不足五千之數所有船貨稅銀未便援例寬免得

旨該番等航海運米遠來慕義可嘉雖運米不足五千之數著免船貨稅銀十分之三以示優恤
欽此八年奉

聖諭上年九月間暹羅商人運米至閩朕會降旨免徵貨船稅銀聞今歲仍復帶米來閩貿易似此源源而來其加恩之處自當著爲常例著自乾隆八年爲始嗣後凡遇外洋貨船來閩粵等省貿易帶米萬石以上者著免其船貨稅銀十分之五帶米五千石以上者免其十分之三其米聽照市價公平發糶若民間米多不需糶買卽著官爲收買以補常社等倉或散給沿海各標營兵糧之用俾外洋商人得沾實惠不致有

粵道貢圖說
糶賣之艱該部卽行文該督撫將軍並宣諭該國王知之

十三年八貢方物外附洋船貢黑熊一隻
鬪雞十二隻太和雞十六隻金絲白肚猿一隻

十四年國王遣陪臣朗呵派提等齎奉金

葉表文八貢

御前方物象二龍涎香一觔犀角六沉香二觔土

璇石十一兩二錢象牙紫降香大楓子豈
蔻膳黃烏木各三百觔胡椒花桂皮檳櫨
齒舌皮樟腦檀香硫黃各百觔蘇木三千
觔上冰片一觔冰片二觔冰片油二十瓢
翠毛六百副孔雀尾十屏紅布幔十疋荷
蘭氈二塊

皇后前不貢象餘物各減半又附洋船貢到黑熊
鬪雞金絲猿令其進獻

又奏准暹羅國使臣朗呵派提等奉表來
京恭遇

聖駕巡幸於

啟鑾之日禮部滿堂官引來使等四人並通事一
人至

圓明園宮門外於

聖駕啟鑾之先行三跪九叩禮

恩賞該國王物件於

宮門前賞給隨率至王公百官送

駕排班之末跪候瞻仰如蒙

慰問來使跪聆畢禮部堂官領回

又是年照康熙六十一年加

賜之例

特賜國王

御書炎服屏藩四字蟒緞片金緞粧緞閃緞各二

錦緞四各色緞八玉器六瑪瑙器二琺瑯

粵道貢國記
爐餅一副松花石硯二方玻璃器五種共
十件瓷器二十三種共百四十六件又因
續進黑熊白猿等物

特賞國王庫緞十二疋

十六年奉

聖諭朕閱潘思桀摺內稱本年六月內收入廈口
暹羅商船一隻買回米四千石等語聞浙各處
現在需米孔殷若官爲辦理豈不於民食更有

裨益但慮官辦或致外人多疑或聞內地官爲
購覓卽乘勢居奇多方措勒必致價值日益昂
貴並使商船來往亦不能隨便攜帶著傳諭喀
爾吉善潘思桀令其會同酌量若無此慮可於
暹羅等國產米之處官爲購運或先行試買看
其嗣後可以源源接濟不致啟番人措勒之弊
抑或應仍聽商人陸續運帶一一詳籌奏聞欽
此尋經總督喀爾吉善等奏稱該國地土廣不

過百餘里戶口無幾每年餘米有無多
並無一定官赴採買番情趨利如鶩難免
居竒昂價急官爲購運止宜聽商自行買
運尙可資其緩未便舉行得

旨俞允

十八年奏准暹羅國使臣郎損吞派沛等
奉表來京恭遇

駕幸南苑已合使臣道旁瞻仰應照例停其

召見

是年喀爾吉善奏暹羅地方近年雖有商
船帶回米石於民食不無裨濟但欲採買
補倉勢須委員領帑前往買運若向商船
招買過洋之米止可隨到隨糶不能日久
貯倉今復加籌酌與其官買補倉不如仍
聽商販帶運隨其多寡皆足有濟民食奉

旨允行其年二月入貢方物加進西洋金花緞番

袍金花緞夾褲各一條西洋金緞帶三條
並懇

賜人淺纓牛良馬象牙及通徹規儀內監部議不
可並請飭使臣於歸國後曉諭國王恪守
規制益勵敬恭得

旨方物照例收受其筵宴賞賚著加恩照上次例
行

加賜人淺四觔錦緞共二十疋及玉器瑪瑙器琺

瑯器玻璃器磁器銅暖硯

二十二年八貢

特賜國王蟒緞錦緞各二疋閃緞片金緞各一疋

八絲緞四疋玉器瑪瑙各一件松花石硯

二方琺瑯器十有三件瓷器百有四件

二十六年議准暹羅國貢船在粵遭風飄

失龍涎香桂皮荳蔻兒茶皮樹膠香五件

免議

二十七年議准暹羅國上年貢物沉溺免其補進復遣探貢船呈請代謝

天恩所有餘艙貨物因多霉濕准其先行發賣免徵稅銀

特賜國王物件與二十二年同

三十一年國王森烈拍照廣勅馬嘯陸坤司由提雅普埃遣陪臣奉金葉表文入貢御前方物馴象犀角沉香上冰片中冰片降真香

大楓子騰黃烏木象牙荳蔻土璇石蘇木樟腦檀香硫黃華撥兒茶皮樹膠香土桂皮翠毛孔雀尾龍涎香冰片油紅布幔荷蘭氈凡二十六種

中宮前不貢象餘物減半

特賜國王物件與二十七年同適因該國爲鄰番所破經兩廣總督奏明將原

頒賞賜繳還

謹按鄰番爲花肚番卽緬甸也

四十六年正月暹羅國長鄭昭遣使朗丕
彩悉呢霞握撫突等二人入貢並奏稱自
遭緬匪侵陵雖復土報仇紹裔無人茲羣
吏推昭爲長遵例貢獻方物奉

旨國長遣使航海遠來具見惻忱該部知道原表
並發欽此

賜宴使臣於

山高水長所貢之物

賞收象一隻犀角一擔其象牙洋錫騰黃胡椒蘇
木准其在廣省自行變價併壓倉貨物一
體免稅

特賞國長蟒緞錦緞閃緞片金八絲緞玉器瑪瑙
器琺瑯器瓷器松花石硯

是年入貢暹羅國長鄭昭恭進例貢外加
進馴象犀角象牙洋錫騰黃胡椒六種奉

旨據奏暹羅國長鄭昭豫備正貢一分具表懇請
代奏并備象牙犀角洋錫等物以爲副貢等語
該國長輸誠納貢備具方物所有正貢一分自
應照例送京收納至所備副貢若概令齎回致
勞往返轉非所以體卹遠人著於副貢內祇收
象隻犀角二項同正貢一併送京交禮部於照
例賞給之外查例加賞以示厚往薄來之意其
餘所備貢物准其在廣省自行覓商變價併將

伊等壓艙貨物均一體免其納稅欽此

五十年暹羅國長鄭華遣使奉金葉表文

八貢

御前方物龍涎香金鋼鑽沉香冰片犀角孔雀尾

翠皮西洋檀西洋紅布象牙樟腦降真香

白膠香大楓子烏木白荳蔻華撥檀香甘

蜜皮桂皮騰黃蘇木馴象二

中宮前方物不貢象餘物減半奉

旨覽國長奏繼嗣父業恪承先志遣使航海遠來
進貢方物誠悃可嘉知道了該部知道欽此

又正月初二日

紫光閣筵燕賞暹羅正使錦緞四疋絨緞二
疋各樣花緞十疋荷包大小十個二使三
使四使錦緞各二疋花緞各六疋荷包大
小各六個

謹案此次

紫光閣筵燕賞暹羅正副使與五十一年悉
同

五十一年奉

聖諭據穆騰額奏稱暹羅國每年正副貢船到關
其隨帶之船至十餘隻之多又有藉名探貢船
隻俱屬內地商船所帶貨物甚多該監督查明
應征稅銀若干報明該督撫具題概行寬免殊
非杜弊防奸之道請將正副貢船各一隻照例

免其納稅其餘船隻俱按貨征稅等語暹羅國
修職輸誠遣使呈進方物其正副貢船自應免
其征納稅銀豈容內地商船藉名影射希圖免
稅此等商船到關時該監督原可逐船履勘除
貢物之外若有私帶船隻無難一望而知自應
按貨征稅該監督卽當商之督撫分別辦理何
得概予具題邀免此係該督撫監督等分內應
辦之事何必形之章奏候朕降旨始奉行耶除

就近傳知穆騰額遵辦外著傳諭富勒渾孫士
毅於該國貢船到關所有正副貢船各一隻仍
照例具題免稅其餘若果查係夾帶客商私船
俱逐一查明按貨納稅以杜奸商取巧通同弊
混之計將此傳諭知之欽此

五十二年入貢

賜宴紫光閣

賞正副使有差

五十三年該國長遣使入謝

五十四年正月初五日

紫光閣筵燕賞暹羅正使錦漳絨各三疋小
卷八絲緞五絲緞各五疋大荷包一對小
荷包四對賞副使錦漳絨各一疋小卷八
絲緞五絲緞各三疋大荷包一對小荷包
二對

五十五年暹羅國王具表遣陪臣進貢並

因慶祝

萬壽加進壽燭沉香紫膠香冰片燕窩犀角象牙

通大海哆囉呢凡九種奉

上諭據奏暹羅國王遣使進貢祝釐於七月十一
日正貢船甫到副貢船尙未抵粵等語該國王
情殷祝嘏恭進方物閱其表文歡欣踴躍具見
悃忱但現屆八月初旬該國貢使抵粵較遲既
未能如期到京隨班慶祝自毋庸卽令趲緊行

程著將該國前後抵粵貢使人等俱酌量令其
緩程行走於年底到京隨入燕賞以示朕體恤
遠人至意欽此

加

賜暹羅國王

御筆福字一玉如意一玉器二瓷器玻璃器八福
字方百幅絹箋四卷硯二方筆三匣墨三
匣雕漆盤四

五十六年八貢正月初九日

紫光閣筵燕賞暹羅正使一員大卷緞大卷
宮綢各四疋大荷包一對小荷包三對副
使一員大卷緞大卷宮綢各三疋大荷包
一對小荷包二對又

特賜正副使八絲緞各一疋筆墨各一匣箋紙各
一卷

六十年八貢方物龍涎香沉香檀香白膠

香降真香金鋼鑽冰片樟腦孔雀尾犀角
象牙西洋氈西洋紅布翠鳥皮甘蜜皮桂
皮華撥大楓子荳蔻騰黃烏木蘇木恭進
皇宮方物其數減半除夕

賜燕保和殿

嘉慶元年恭進

太上皇帝

仁宗睿皇帝漢番字金葉表文並方物正月初四

日舉行千叟燕暹羅使臣在

宣壽宮八燕

特賜正使

聖製千叟燕詩一章玉如意壽杖各一錦緞洋花
緞雲緞大卷緞各二福字箋一卷絹箋二
卷湖筆二十枝硃墨十錠硯一鼻煙一瓶
鼻煙盒瓷牙籤筒洋漆茶盤各一副使錦
緞洋花緞各一絹箋一卷湖筆十枝硃墨

四錠餘賞與正使同

又燕於

紫光閣

正大光明殿

山高水長

加賞有差

其年又遣使齎金葉表文慶賀

太上皇帝歸政恭進龍涎香上冰片中冰片沉香

金鋼鑽孔雀屏犀角象牙荷蘭毯紅毛氈
布翠鳥皮白檀香白膠香樟腦甘蜜皮桂
皮華撥降真香大楓子白荳蔻騰黃烏木
蘇木凡二十四種恭進

皇宮前貢物減半又慶賀

仁宗睿皇帝登極並進

皇后貢物均與慶賀

歸政貢同

二年正月初十日

紫光閣筵燕

特賞暹羅使臣與元年同

三年使臣在京

召入

重華宮筵燕賞正副使荷包芽茶鼻煙壺火

鑱玻璃碗福橘等物

四年入貢

賜宴如例

五年國王遣使齋祭文儀物恭詣

高宗純皇帝前進香並進獻方物經廣東巡撫遵旨令該使臣毋庸進京所有呈獻儀物方物令齋

回欽此

六年入貢

賞使臣羊裘纓帽奉

聖諭暹羅國第二貢使帕窩們孫哞哆呵叭突在

廣州南海地方患病身故情殊可憫現已飭地方官妥爲照料著加恩再賞銀三百兩遇有該國便船卽令先行帶回將銀兩給伊家屬不必等候此次貢船回國轉致稽緩嗣後如遇有此等外國使臣在內地身故之事著照此例辦理欽此

七年正月十二日賞暹羅正副使與二年同

八年十二月二十八日賞暹羅使臣四員從人十九名衣帽鞞襪均與六年同通事一二員與賞貢使同二十九日

重華宮筵宴

特賞三貢使四貢使各瓷盤一件玻璃器二件小荷一對茶葉一瓶瓷器一件

九年八

重華宮筵宴

加賞使臣通事有差

十年正月初十日

特賞暹羅大貢使錦三疋漳絨三疋大卷八絲緞四疋小卷五絲緞四疋大荷包一對小荷包四對二貢使錦二疋漳絨二疋大卷八絲緞三疋小卷五絲緞三疋大荷包一對小荷包四對三貢使四貢使各錦二疋漳絨二疋大卷八絲緞三疋小卷五絲緞三疋

疋大荷包一對小荷包二對

十年十二月二十九日暹羅貢使於

重華宮入燕加賞貢使玻璃瓶二個玻璃鼻煙壺一個瓷帶鈎一個茶葉二瓶橘子一盤荷包二對二貢使三貢使四貢使各玻璃碗二個荷包一對餘俱正貢使同

十二年暹羅貢使於

重華宮入燕加賞二貢使四貢使各玻璃碗

一對玻璃鼻煙壺一個瓷帶鈎一個茶葉
二瓶福橘五個瓷碟一個荷包一對副通
事一員荷包一對

九月奉

聖諭外洋諸國夷人自置貨船來廣貿易自應專
差夷目親身管駕不得令內地商人代爲販運
今金協順陳澄發皆以內地客商領駕暹羅國
船隻載貨販賣雖詢明委係該國王所遣並無

假冒捏飾及夾帶違禁貨物但該國王何以遽
肯造船交伊等管帶情節不無可疑且恐日久
相沿必致奸徒潛往外夷賒欠誑騙或竟冒爲
夷貨代盜銷贓不可不防其漸吳熊光請敕下
禮部於該國貢使到京時傳知飭禁恐該貢使
回國傳述未能詳切現已另降敕諭申明內外
體制所有金協順等船二隻旣已駛至內地姑
准其起貨納稅另置新貨給照回帆自此次飭

粵道貢國記
禁之後如再有代駕夷船進口卽查明懲辦欽此又

敕諭暹羅國王鄭華嘉慶十二年九月據兩廣總督吳熊光奏稱有船商金協順陳澄發裝載暹羅國貨物來粵貿易並請於起貨後裝載粵省貨物回赴暹羅經地方官查明金協順係福建同安縣人陳澄發係廣東澄海縣人飭傳暹羅國貢使丕雅史滑釐詢問據稱金協順陳澄發

一二船委係由該國新造來粵因該國民人不諳營運是以多倩福潮船戶代駕並非冒捏呈遞譯書稟結等情天朝綏懷藩服准令外域民人赴內地懋遷貨物惠逮遠人恩至渥也惟是中外之限由晝釐然設關譏禁古有明訓我朝撫御諸邦如朝鮮越南琉球等國各以本地物產來中土貿易皆係其本國民人附朝貢之便齎帶前來從未有中國之人代彼經紀者今金協

順陳澄發以閩廣商民代暹羅營運卽屬違禁中土良民謹守法度斷不敢越制牟利其私涉外域者此中良莠不齊設將販運貨物隱匿拖欠致啟訟端亦於該國諸多未便本應將金協順等飭法治罪念其船隻係由該國製造給令代駕從前未經嚴立科條此次且從寬免究並施恩准其起貨售兌仍給照令其置貨回帆特降敕諭知該國王宣明例禁嗣後該國王如有

自置貨船務用本國人管駕專差官自帶領同來以爲信驗不得再交中國民人營運若經此次敕禁之後仍有私交內地商民冒託往來者經關津官吏人等查出除不准進口起貨外仍將該奸商治罪該國王亦難辭違例之咎柔遠能邇寬既往以示含宏之義宅中馭外申明禁以嚴踰越之防爾國王其凜遵毋忽特諭

十三年暹羅貢使入蒙古包燕加賞大貢

使與乾隆六十年朝鮮正使同二貢使三

貢使四貢使與朝鮮副使同

十四年暹羅國遣使祝

嘏進貢壽燭十對金鋼鑽一觔冰片二觔燕窩十

觔沉香二十觔犀角二十觔孔雀尾五十

屏翠鳥皮五百張檀香一百觔降真香一

百觔砂仁米一百觔紫梗一百觔象牙二

百觔荳蔻二百觔胡椒二百觔騰黃二百

觔荷蘭種二領

加賞正副使筵宴

重華宮如儀其國王表請倩僱內商駕船奉

旨不准表文給還夷目帶回欽此

暹羅國世子鄭佛遣使進貢請

封在洋遭風沉失貢物九種奉

聖諭據百齡等奏暹羅國齋貢使臣抵粵一摺該

國貢船在香山縣屬荷包外洋突遇颶風擊壞

粵道貢國記
沉失貢物此實人力難施並非使臣不能小心
防護其沉失貢物不必另行備進用昭體卹所
有鄭佛懇請勅封之處著該衙門照例查辦俟
該使臣回國卽令領齋欽此

十月初一日暹羅貢使於

重華宮入燕加賞正使一員洋瓷帶鈎一個
玻璃鼻煙壺一個玻璃碗一對紅橘一碟
茶葉一瓶荷包二對副使一員荷包一對

餘與正使同

十五年

封世子鄭佛爲國王照例給與

誥命銀印交該國使臣祇領恭齋回國

正月初十日暹羅貢使入蒙古包燕加賞
正副使均與乾隆六十年朝鮮正副使同
十六年正月初四日暹羅貢使於

紫光閣入燕加賞正副貢使四員均與乾隆

六十年朝鮮正副使同

十七年十二月暹羅國進貢方物貢使於
重華宮入燕加賞正副使二員各玻璃瓶一
對茶鍾一個玻璃鼻煙壺一個茶葉二瓶
大荷包二對

十八年十二月奉

聖諭前據蔣攸銛奏暹羅國正貢船隻在洋失火
所載貢使人役及表文方物等件俱無下落僅

有副貢船抵粵當經降旨將該國副貢使及所
存貢品十種派員送京無庸補備正貢今又據
蔣攸銛奏該副使啣拔察哪丕汶知突因在海
船感冒風寒又聞正貢船失火焚燒致受驚恐
現在患病難以起程請俟醫治痊愈再行護送
入都等語該副貢使患病受驚正需調理長途
跋涉甚非所宜現已屆年節不必再令進京著
加恩令將所存貢品十種就近交貯粵省藩庫

由該督委員解京其副貢使令在粵休息妥爲調治該國王抒忱納費其正副貢使適因事故不能到京而航海申虔卽與齋呈無異所有例賞該國王及貢使人役物件著禮部查明奏聞將賞件發交該督轉行頒給該副貢使令其於病痊之日齋領回國並將此旨傳知該國王以示懷柔遠人之意欽此禮部遵

旨將例

賞物件併

敕書交兵部發交兩廣總督頒給

十九年該國遣使補貢正貢船遭風漂至越南副使在粵患病該國王聞遭風之信復補備貢物遣使來京

賜宴紫光閣

賞正副使有差

二十年九月奉

聖諭蔣攸銛等奏暹羅國王聞上年貢船被風損壞復備副貢船遣使補備方物到粵一摺暹羅國所進嘉慶十八年正貢船在洋焚燒其副貢船所齎貢品業經進呈十九年該國王敬補方物分裝正副船入貢適遇颶風漂散現在正副船已先後收泊其表文方物由該貢使齎送赴京該國王因聞貢船遭風之信復備補貢方物來粵其恭順實屬可嘉該國向係三年一貢明

年又屆八貢之期著加恩卽將此次齎到方物作爲嘉慶二十一年例貢交粵省藩庫存貯俟明年委員解京其使臣巧鑿紋是通畱於粵省俟本年進京各貢使旋粵時一體筵宴俾合回國並傳知該國王明年無庸另備表文方物航海遠來以示懷柔至意欽此貢使到京八

同樂園聽戲

賞正副貢使有差國王復表請用內地水手駕駛

船隻經禮部奏駁奉

旨依議欽此

二十四年副使至京進

萬壽貢大壽燭五對小壽燭五對冰片二兩金鋼
鑽一觔沉香二十觔燕窩十觔犀角二十
觔檀香一百觔荷蘭毯二領降真香一百
觔荳蔻二百觔砂仁二百觔胡椒二百觔
翠鳥皮五百張孔雀尾五十屏象牙三百

觔膾黃二百觔紫梗二百觔又貢方物如
例

加賞副使玉如意仙果獻瑞花普洱茶膏人蔘膏
蜜餞荔支哈密瓜

賜宴正大光明殿入

同樂園聽戲

道光二年遣使入貢方物如例

三年遣使恭進

萬壽貢

賞賜有差

七年九年並八貢方物如例

十年恭進

萬壽貢

十一年十四年十七年並八貢方物如例

十九年三月奉

上諭向來暹羅三年一貢著改爲四年遣使朝

貢一次用示朕綏懷藩服之至意

暹羅國入貢儀注事例

貢使人等到省委員備辦牛酒米麵筵席
等項俟起貯表文方物後前赴犒賞

起貨通事船主先期將壓艙貨物呈報廣
州府轉報委員查明其貨物數目飭兩冊
彙同表文方物由司詳候督撫會疏題報
俟題允日招商發賣其應納貨餉候奉部

行分別免征

貢使入京通事將起程日期具報廣州府轉報布政司移會按察司頒發兵部勘合一道驛傳道路牌一張並請院憲委護送官三員隨同伴送將上京貢使人員廩給口糧夫船數目填註勘合內經過沿途州縣按日辦應其在省看守貢船人等以奉旨准貢日移明糧道每名每日支米八合三勺

貢使入京伴送官文職應委道府大員武職應委叅副大員並委丞倅一員隨往長途護送進京外自省起程前抵韶州府例委分巡廣州府之督糧道護送彈壓自韶州府至南雄州度嶺委該管之南韶連道護送彈壓出境仍飭各屬照例應付不准絲毫濫應京旋之日一體照辦
貢使進京貢使通事先將起程日期報府

轉報預行取辦祭江猪隻吹手禮生應用
然後起程

貢使委員自京護送

勅書大典回廣船到河下迎請安奉懷遠驛館遵
奉筵宴一次等候風汎便日上船回國
貢使京回廣州府卽諭令各船修葺俟風
帆順便回國所買回國貨物除一切違禁
物件不許買帶外其應買貨物俱照定例

聽其買回應委官一員監督盤運下船毋
得違禁夾帶并令護送該船出口俟其揚
帆回報

會驗暹羅國貢物儀注

是日辰刻南番二縣委河泊所大使赴驛
館護送貢物同貢使通事由西門進城至
巡撫西轅門停放貢使在頭門外帳房站
立候兩縣稟請巡撫開中門通事行商護

送貢物先由中門至大堂簷下擺列通事復出在頭門外候兩縣委典史請各官穿襜褕掛朝珠至巡撫衙門通事引貢使打躬迎接各官會齊陞堂開門各官正坐司道各官傍坐通事帶領貢使由東角門報進至大堂簷下行一跪三叩首禮賜坐賜茶各官卽起坐驗貢畢將貢物仍先從中門送出西轅門通事引貢使由西角門出

至頭門外站立候送各官回將貢物點交通事行商貢使同送回驛館貯頓

貢使貢畢回國在廣東省筵宴一次額支銀一十七兩五錢又貢使船隻在省守候梢目水手等每名日給口糧米八合三勺於奉

旨准貢之日起支貢使回廣之日住支伴送之委員自省赴京往回額給盤費銀五十兩均

於廣東存公銀內并地丁項下額支米內
動支

暹羅貢使坤匣派拍紗來謁列貢船數以
上具言船名烏頭夾板舵正貢船長九丈
九尺中廣二丈五尺三寸深一丈五尺四
寸頭廣八尺尾廣一丈四尺桅名打馬樹
大者長七丈五寸圍九尺次長五丈九尺
五寸圍七尺象船長八丈二尺四寸中廣

一丈八尺深一丈四尺頭濶四尺八寸尾
濶一丈大桅長六丈六尺圍五尺五寸次
桅長五丈三尺八寸圍四尺正船空時食
水七尺裝載食水一丈一尺五寸象船空
時食水五尺裝載食水一丈二寸以康熙
二十二年五月初二日發本國正船於閏
六月二十日抵虎門象船於六月初十日
自廣南外暹失風漂至廈門九月二十一

粵道貢國說
日始至虎門

謹案該國貢船大畧如此此見杜榛粵閩
巡視紀畧附引之俾得其槩云

粵道貢國說卷二終

